

續修白鹽井志

卷捌

地 350/297
739
18

卷捌

人物志

鄉賢卓行
忠節孝友
宦蹟義行
文學流寓
列女仙釋



續修白鹽井志卷之七

人物志

白井自唐宋以前界於蠻荒元明以來列爲內地由是人材輩出號彬彬矣至我

朝聲教所訖俗美化行則人物之挺生類皆秉山川之鍾毓然不溯昔賢罔知遺行詳列志乘乃勵後人苟鄉閭之可師卽德行之卓絕況乎草野而矢節烈仕

續修白鹽井志

卷七人物志

序略

途銘功家庭而盡天經慷慨就義推之儒林饒風雅之士淑媛揚芳懿之徽與夫寄跡樂郊遊心方外是皆秀拔於羣倫而增簡冊之光者也茲列爲十門俾綱舉目張有條不紊云

鄉賢

卓行

忠節

孝友

宦蹟

義行



文學

流寓

列女

仙釋

續修白鹽井志

卷七人物志序略

二

鄉賢人物志之一

天下郡邑有立名砥節維世翼教者

詔建鄉賢祠於黌宮之次歿則請於

朝而祀之予以俎豆千秋甚盛典也并舊志所載鄉賢

五人皆元明奏准入祠者至我

朝端人正士經明行修應祀鄉賢者代不乏人特未經

題請不敢屢列編爲卓行一篇以俟

盛世之褒揚云

元

趙和互見孝友

續修白鹽井志

卷七人物志 鄉賢

三

明

邱鑑互見孝友

僕應東互見文學

席上珍互見忠節

李秀白互見孝友

趙和元至正間姚安同知宗于六子也父亡世亂母

氏楊適楚雄倉官後以罪戍遼東楊氏偕行和年十

四歲日夜泣涕思母遂隻身尋至遼東楊氏夢和在

河邊次日至河浣衣見一童詢之果和也母子泣認

謀歸主者留不卽遣和苦請乃得俱還渡遼河遇險

不溺中途有虎啞人母子亦無恙人以爲孝感所致

有司詳請旌表參雲南通志滇繫井舊志



邱鑑成化甲午舉人性純孝任程番府推官有惠政
思母致仕及歸修德養親安貧樂道人無賢愚莫不
佩其德行云

井舊志

僕應東天啟甲子歲貢廷試貢元第一居家孝友接物
和平博學廣聞人所推重提學何閎中獎以文教名
人之額

井舊志

席上珍崇禎壬午舉人磊落尙氣節聞孫可望入滇與
知姚州何思大姚舉人金世鼎據守姚安城可望遣
張虎攻陷之世鼎與思自殺上珍被執至昆明可望
呵之上珍厲聲曰我大明忠臣肯爲若屈耶可望怒

續修白鹽井志

卷七人物志

鄉賢

四

命引出斬之大罵不絕賊怒甚遂磔於市康熙間賜
諡忠烈乾隆間崇祀會城三綱祠

參明史本傳
滇繫井舊志

李秀白廩生性謙和幼喪父孤貧力學事母張氏至孝
母遘疾將革白焚香祝天請以身代母尋瘳踰一載
無疾而逝白漿水不入口者三日哀毀骨立及塋廬
墓三年有司上其事御史陳學夔表其門曰篤孝萬
厯二十年卒塋於白塔對面西山之麓碑誌云旌獎
孝子賜冠帶榮身李公之墓

參雲南通志井舊志

卓行人物志之二

唐書立有卓行一篇所載皆志潔行高卓然獨異之士蓋本後漢書之獨行傳五代史之一行傳而異其名也并舊志文行同列體例未詳茲倣唐書傳例詳稽博訪萃爲此篇庶勵行者用垂儀型而景行者藉以興起則發微闡幽以誌不朽云

國朝

夏

瓊

文學見

李建中

文學見

王

遜

文學見

趙其名

文學見

段紅

劉道毅

羅

銓

義行見

彭泰年

義行見

甘岳

義行見

續修白鹽井志

卷七人物志卓行

五

張作賓

陳典章

張

楹

弟植互見文學

甘守誠

張輝堂

文學見

張

璧

文學見

張文鶴

忠節見

羅天貴

羅其瑋

孝友見

夏

瓊歲貢生早孤事叔如父發憤力學言行不苟設

教明倫堂從遊者眾歲薦後尤方正自持有饋金浼其到官者瓊曰公門非儒者所宜入况復以賄相市顧可枉已失守乎竟不往

并舊志

李建中恩貢生持躬謹慎士類景從工詩賦書法提舉

遲斫師事之

并舊志

王

遜歲貢生性溫良立身廉介任鎮南州訓導勤於

教誨官民咸敬服之致仕歸甯靜自如不慕榮利舉
大賓白井科第多出其門

井舊志

趙其名府學廩生少孤力學恪遵母訓性端謹不隨時
趨教誨生徒不倦二兄早逝教其子孫無異已出均
克成先志焉

井舊志

段紅歲貢生性和平以禮自持言行不苟人佩其德
五舉鄉飲僎賓提舉獎以皇恩重賜之額

井舊志

劉道毅康熙間文生也立品端嚴德器粹然時人高其
行史學尤精提舉孔尙琨贈以才優司馬之額

採訪

羅銓府學歲貢天性孝友曲體親心敦篤同氣時以

續修白鹽井志

卷七人物志

卓行

六

德行文章爲砥礪喪葬遵古制不用浮屠諸姪早孤
悉爲婚嫁尤好善樂施承先志捐金旦庄田租百餘
石爲南北兩館義學束修及孤貧口糧歲修之費通
詳勒石又捐百金修文廟捐九十金入義學有司上
其事 憲獎以利濟善述忠宣遺範有功黌序各額
在姚安捐送義田在楚雄捐三百金置社田有佃民
因事鬻子者代償其銀使獲完聚其他隨事利濟不
令人知者甚多後嗣科貢不絕人以爲積德之報云

參雲南通
志井舊志

彭泰年入國子監肄業三年例滿朝考州判雍正四年

總督鄂以言切吏治才堪任使保送引見着歸班候選雅好琴書著有錢園說提舉白允旌以志亞陶潛之額遺命送地基鋪房入龍吟書院

井舊志

甘 岳嘉慶戊辰科進士也任山西太谷知縣仁慈愛民致仕後主講靈源書院兩舉鄉飲大賓年逾七旬縣民遇致壽屏祝嘏生平孝友謙和尤好周恤親鄰不使人知倡捐設桂香義館於鎖水閣以教貧寒子弟其他義舉甚多井人佩其德行焉

採訪

張作賓嘉慶間歲貢也學問博洽制行高潔以禮自持尤好先正格言隨材指授不憚講解感化者多

採訪

續修白鹽井志

卷七人物志

卓行

七

陳典章嘉慶間文生也居心長厚制行端謹教子義方里人稱之

採訪

張 楹道光間恩貢也性敦孝友以禮束身博覽羣籍教授於鄉從遊者俱嫻於禮法與弟增生植友愛尤篤互相師友有二難之譽通學贈以文行楷模之額

採訪

甘守誠道光間歲貢也性廉介砥礪名節不樂時趨鹽局學產公事絕不干預暇則閉戶讀書手不釋卷族姓皆遵其教焉

採訪

張輝堂道光間恩貢也性純樸薄華侈通經史從遊者

眾任昆陽州訓導歷任刺史慕其品學屢聘主講巨橋昆陽各書院勤於訓迪以德行文章相勗官民咸敬服之年七十有九致仕歸著有藕塘雜詠四卷課躬文稿八卷

採訪

張璧道光間歲貢也品行端方博學多聞講學授徒教法詳整從遊者眾時科甲諸君欽其品學咸相推重主講靈源書院多年耄猶不倦一時文風稱極盛焉

採訪

張文鶴道光乙酉拔貢也立品方正德粹學優主講靈源書院十餘年井中名士多出其門經營學產絲毫

續修白鹽井志

卷七人物志

卓行

八

不苟爲士林所矜式咸豐十年白井失陷杜門不出蓄髮憂鬱而卒

採訪

羅天貴道光間文生也敦樸長厚淡泊自如與世無忤望重鄉間以醫術濟時教二子成名受封典者十餘年壽九十五歲終井里中欽慕不置焉

採訪

羅其璋同治癸酉拔貢光緒乙卯舉人也品行端正持躬謙和好讀書凡經史子集及醫卜方技之學悉皆博覽淹貫尤工詩文書法性純孝善體親心扶持不少怠故封公頤養冲和年逾大耋而神明不衰事兄友愛尤篤婉愉以將終身無拂逆之色族黨稱之無

間言修建龍吟書院籌貲度材綜理微密朝夕監督
皆身任其勞工竣賤目清晰費不及半而規畫井井
有條人無賢愚皆敬愛之

採訪

續修白鹽井志

卷七人物志

卓行

九

忠節人物志之三

粵稽咸同之間西迤叛亂勢起逆回竊踞於榆城蠶夷揭竿於山谷而流寇之乘機竊發者聚散颺忽所在多有白井當數寇之衝城池兵防俱無足恃且產鹽重地賊所垂涎故十餘年之間蹂躪二十餘次或井陷捐軀或臨敵致命貞心大節金石同堅不有紀錄奚闡幽光茲立忠節一門擇其赴義凜然者各立小傳以補舊志之缺其他臨危殉難者八百餘名已奉文入祀昭忠祠矣此篇畧而未錄非有所軒輊於於其間蓋懼煩也

續修白鹽井志

卷七人物志忠節

十

明

席上珍詳鄉賢

國朝

王濟

甘時清

郭勝舉

季餘香王廷先

文體中

段名成李斯盛

彭瑞清

羅羣書

互見文學

楊晉

陳濤

李時升

張文鶴

詳卓行

李輝廷

甘銳

李維新

劉克愛王致中

楊鵬漢

樊汝璋等四人

柴應芳

張振鵬等十四人

王墉

等十六人

甘世賢

詳孝友

王濟廩貢生援例在監肄業授羅平州訓導陞賓川

州學正咸豐七年署蒙化訓導時回逆叛踞大理賊
目蔡其二圍攻蒙城濟同郡守鄧國煊千總王開琦
悉力拒守賊施放地炮城被轟陷濟身中四傷當卽
斃命採訪

甘時清道光丙午舉人也性嚴厲博學工文以大挑選
援保山縣教諭縣爲賊踞未赴任在省投効咸豐十
年奉委同副將銜鄭洪順進攻白井紮營井南李家
庄屢有斬獲賊不支將遁矣適僞大將軍楊德明率
大隊來援四面抄截官兵潰散時清陣亡採訪

郭勝舉井人也家貧食力膽識過人慷慨任事咸豐十

續修白鹽井志

卷七人物志

忠節

十一

川三

年回夷踞井五月副將鄭洪順舉人甘時清奉檄攻
井勝舉密約井紳率壯勇二十餘名潛往行營投効
進師井南奮勇前驅連戰皆捷回渠楊榮退守龍泉
寺壯勇李餘香乘夜入井與井紳謀結夷匪夾攻逆
回事垂成矣適勝舉爭先誘敵被賊截擒賊命供同
謀之人啖以重利誘以僞職皆不答賊怒命剮之血
肉狼藉終不言竟陵遲死井紳獲全六月師潰而投
効之壯勇亦皆戰歿有爲內應而謀泄者文生王廷
先於同治六年四月官兵攻井謀裏應外合賊并其
子連生殺之採訪

文體中等三人井民也少年英勇有膽力咸豐八年十月流寇毛老三等襲井突於各關隘放礮呼聲震地井人驚惶無措時有義勇聚集多名分投各關堵禦體中等亦號召數十人率之出大南關至金字山半有賊數百人搖旗馳驟而下體中等賈勇爭先與之相敵傷賊數名賊怒極力攻之眾寡不敵力盡被殺其二人乃段名成李斯盛與體中同時戰歿採訪彭瑞清咸豐辛亥科舉人默識經史績學寡言咸豐十年井陷有偽官逼之辦糧不從被害採訪羅羣書道光庚子副榜已酉舉人也淵雅靜謐通經史

續修白鹽井志

卷七人物志忠節

十二

川三上

擅時藝尤工古文辭主講靈源書院經其指授悉有文名著述甚富兵亂散失所遺楮爭相揣摩咸豐十一年回逆踞井隱身薙髮有怨家從逆而欲以自解者薦授偽職以污之賊屢脅不屈監解姚州至黎武絕食而死採訪

楊晉道光丙午科副榜勵志力學規步繩趨爲時推重主講靈源書院咸豐十一年回匪踞井脅以偽職憂憤而卒採訪

陳濤增生性和平敦品好學鄉里重之咸豐元年欽選孝廉方正十一年賊匪踞井被脅不屈絕食死採訪

李時升道光甲辰科武舉咸豐十一年回匪竄井時升防剿陣亡陰恤如制採訪

李輝廷井內壯勇也同治元年三月十四日偽參軍王廷鑾求助偽大司馬楊德明敗回之賊一萬有餘由姚進攻輝廷率隊巡哨至通濟橋而賊前驅將至輝廷持戈麾其眾曰臨陣無勇何以拒敵況在父母之邦安忍縱賊屠毒乎言未已賊大至其伴奔避輝廷隱身橋垣以待賊不敢逼以銃遙擊之及賊酋已至令悍賊挺矛突進輝廷奮勇格鬪傷賊二人賊怒圍而刺之身中百餘傷而死賊亦譽其英勇云採訪

續修白鹽井志

卷七人物志忠節

十三

甘銳武童也隨署鶴麗鎮錢大川軍營効力積功至署龍陵營千總同治二年隨師進攻白井營赤石岩以勞瘁卒於軍陰卹如制採訪

李維新增生也工詩詞精舉業投協鎮錢大川營疊著功績保授訓導同治二年防守牛井賊大隊來攻大川以出請援軍爲詞委之固守月餘援絕營破死之時有保舉縣丞文童王致中保舉訓導庠生王士昌劉克愛亦効力軍營與李維新同時殉難皆陰卹如制採訪

楊鵬漢道光間歲貢也博通經史夙擅文名屢薦不售

充當五華書院學長歸井授徒有人詞曹者同時歲貢樊汝璋應貢甘時熙張士杰皆博學能文教授生徒咸同間回匪先後陷井被脅不屈均憂憤而亡有生員劉占熊因夷匪踞井恐被執受辱投河死

採訪

柴應芳武童也勇敢有爲隨營効力疊著勞績積功至花翎遊擊銜同治六年隨中協馬向龍攻姚州五月初三日賊逼海埂大營兵潰應芳陣亡又同治元年四月從官軍帶練陣亡者武生張振鵬姜培根有陣亡赤石岩者文生樊世盛有從官軍剿賊陣亡而年月無可考者王壽民李愷樊如蘭常俊王宗堯劉恩

續修白鹽井志

卷七人物志

忠節

十四

選趙金錫季芳春孟節昭何光興皆白井人也

採訪

咸豐十年四月回匪陷井被執不屈死者廩生王墉增生羅其勳張塾文生樊汝瑛楊鵬兆劉靄文童余恩浩何天顏王家柱彭紹孔張翠樊汝亮甘循皆同日遇害同治元年三月井陷不屈死者張右箴李毓華樊新宇皆文生也

採訪

孝友 人物志之四

孝友一門晉書始創歷代史志因之迨文皇復編爲孝友傳誠以孝子友愛之行闡揚宜亟亟也并舊志以孝義附於文行體例淆雜茲本晉書傳例彙爲此篇庶克盡天倫者幽光用闡且以補舊志之未備云

元

趙和 詳鄉賢

明

邱鑑 詳鄉賢 李秀白 詳鄉賢

國朝

續修白鹽井志

卷七人物志 孝友 十五

王蔭遠

季望魯

張士鏌

羅銓 詳卓行

羅萬理 互見義行

甘時祥 甘時達

楊衍祚

劉調

張來復 弟來燕

孟承堯

趙國寶

文在中

張榕 子文煊

姚湘

羅堯章 詳義行

王春和

布五山

羅其瑞

王國安 張澤周 季榮恩

彭祖慶 羅羣良

王永泰 白玉珮

張洛

王培 甘世賢

羅其璋 詳卓行

王蔭遠府學廩生也三歲而孤家貧及長致力於學敦行不怠祖母張及生母何備盡色養歷五十餘年公

舉節孝建雙節坊盡力營造侍祖母疾衣不解帶及卒哀毀踰常治喪不用浮屠曰吾不忍誣吾親爲地獄罪人也塋後廬於墓側乾隆十五年舉順孫井舊志

季望魯歲貢逢甲之孫也十歲而孤祖年老有叔已故叔母孀居家甚貧望魯事祖及二母竭力不怠生母又亡祖年八旬繼逝拮据喪塋身心交憊孝養二十餘年人無間言公舉順孫提舉查實獎勵井舊志

張士麟乾隆間文生也事母孝性靜穆於別墅築紫雲居奉母其中母疾割股及歿廬墓三年又鐫感應篇淺註以勸世其他義舉亦多焉採訪

續修白鹽井志

卷七人物志

孝友

十六

羅萬理文庠生進士憲章之父也少敏達性孝友雅好讀書入泮後以親老家貧食指日增遂棄學煎鹽爲業俾一兄三弟致力詩書恆以道義相勗其後或鄉薦或明經或食餼先後成名持家十餘年田產日增析產時以手置之業均分絲毫無隱漏親族皆重之尤好善不倦倡捐置喬井公產親身經理以餘息積田租百餘石其他施棺寒衣掩骼施水諸善舉皆爲之倡賬目清晰前此所未有也有子五長子已入泮娶婦值大疫相繼而亡晚年復生五子俱有名於時人以爲積德之報云採訪

甘時祥井文庠弟時達應貢生互相友愛礪品績學時祥以父老代理家政入局辦公奉孀祖母博其歡心令時達肄業五華書院十餘年文名藉甚屢困棘闈棄之而歸開下關鹽號族子仰食者多不與計較遂折閱失業時祥毫無怨尤愈相親愛時達乃課徒奉兄及應貢而卒時祥撫其子孫恩義兼盡無異已出里人多稱孝友云

採訪

楊衍祚井處士克盡子職人稱其孝咸豐五年舉孝子奉

旨旌獎准其建坊

採訪

劉調道光間增生恩貢青藜三子也性孝友善體親

續修白鹽井志

卷七人物志

孝友

十七

心佐理家政兄弟六人互相友愛老而彌篤父命析產調均分爲六毫無私積好學工書法日以格言授徒子孫恂謹受業者多敦實行族姓皆率其教焉

採訪

張來復道光間恩貢弟來燕庠生性純雅謙和敦篤友愛家庭內外毫無間言其子弟亦承順無違里人稱之

採訪

孟承堯道光間庠生也性孝友昆弟四人長兄渾樸二弟俱幼親歿家計愈窘承堯棄學爲商以給朝夕俾二弟讀書成名凡父母喪塋弟妹婚嫁皆身任之無德色而友愛逾常析居時舉其蓄積悉爲分授無纖

臺隱瞞其友愛之行今猶膾炙人口云

採訪

趙國寶文庠也性謹飭敦孝友事親克供子職家貧食指甚繁國寶獨任其勞家無間言人多重之

採訪

文在中井增生性耿介有孝行家貧力學舌耕養母教法謹嚴生徒皆恂恂焉咸豐十一年井陷被戕

採訪

張榕國學生子文煊諸生也性俱樸實慈孝無間榕母年七十有餘父子盡心色養咸豐十年回匪陷井文煊負祖母奔逃榕扶之以行賊追至欲殺榕母父子爭護之均被殺於樊良阱榕母竟得免

採訪

姚

湘道咸間人也目不識書而事親有至性家貧爲

續修白鹽井志

卷七人物志

孝友

十八

傭以養親順從無違井人咸稱其孝喜惜字兵燹時世家藏書皆移徙狼藉湘日拾取而焚之不遺餘力

採訪

王春和從九品也孝友誠篤母疾剜股以進生平好善不倦刷勸善書口述格言人多感悟壽至七十八歲

採訪

布五山原名方岳以字行貢生布施南長子武庠也性爽直率真克敦孝友事親順從無違撫弟親愛有加久辦鹽務與同事和衷商榷未嘗立異人多親昵之至其孝友之行尤爲無間人言云

採訪

羅其瑞文章也年十六歲咸豐十年賊匪陷井負祖母
奔逃賊追及之將及祖母其瑞挺身以護賊怒殺於
灶戶衝溝中其祖母得免

採訪

王國安武庠也性謹樸事親以孝聞同治元年白井大
疫母病垂危醫辭不至國安憂惶無措焚香籲天割
股煎湯以進母復蘇延旬餘以微疾而逝有割股療
母復爲繼嗣舅父而割股者張澤周也同時有監生
季榮恩白玉佩割股療父疾人並稱其孝焉

採訪

彭祖慶舉人紹先長子也紹先避亂他適祖慶幼家貧
卽知奉養孀祖母曰入市售微物爲業以餘息歸奉

續修白鹽井志

卷七人物志

孝友

十九

甘旨人皆憫其孝咸豐十一年回匪陷井被戕同時
有儒童羅羣良者年二十餘有至性同治元年三月
入鄉收租適回匪陷井羣良恐祖母及母有失回井
尋訪被賊殺於途

採訪

王永泰嘉慶庚午舉人通海教諭時行之曾孫咸豐辛
亥舉人庭棻之姪也年十六同治六年回逆陷井執
其全家將戮之永泰哀求賊喜其英俊謂之曰爾能
爲吾子全家可免永泰允諾遂攜之營中適官兵來
攻永泰知全家已遁謂賊曰吾之假爲爾子者爲救
全家計耳焉有詩書世胄而爲叛賊之子乎罵不絕

口賊怒殺之殘其屍督學李岷琛給以王皓遺襪之
額奉 旨旌表孝烈准其建坊入祀孝弟昭忠二
祠採訪

張 洛文庠也性耿直持躬謹厚父疾衣不解帶者數
旬疾革割股以進父旋瘳母疾亦然偶拾遺金詢失
者還之有病預知臨終時日其治家有法二子亦有
父風焉採訪

王 培例貢生舉人守道之父也純正長厚處世謙和
父紹熙以選貢宦廣東祖母年邁未就養培拳拳孺
慕盡心侍奉不少怠及卒喪盡禮旋請父任數年
續修白鹽井志 卷七人物志 孝友 二十

父卒宦囊亦罄乃習幕爲業勤慎誠實聘之者恆託
以心腹焉光緒初年白井平長子守義子身往迎遂
扶父柩而歸以禮殯葬居平好善不倦德器粹然鄉
里敬之採訪

甘世賢井文生也性孝友謙謹重義幼孤善事祖父母
與孀母奮志成立率諸昆季勤學讀書十五入庠族
黨器重多以子弟受學舌耕養親終祖父喪葬值地
方多事改業販鹽克濟時艱因公賄累訖無怨言咸
豐九年夷回之亂履危涉險十一年招集鄉勇赴張
撫憲轅請檄旋攻營井東赤石岩恐激賊將馬應良

怒燒殺居民誘賊東郊兜擒截殺賊累困拒關扼險
陰雨糧乏賊援大至眾寡不敵師敗憤死採訪

續修白鹽井志

卷七人物志孝友

三十二

八十八

宦蹟人物志之五

風行南國家封召伯之棠雨膏西京人頌郇侯之黍
一行作吏聲施不朽矣白井自元明建學校設科目
數百年來邦人士之登仕籍而著聲稱者代不乏人
茲遵滇志傳例立宦蹟一門以志名蹟若夫偉人碩
彥之蒞於斯土者既以名宦循吏諸篇表厥謨猷庶
與此篇有所區別云

國朝

張昊

樊仲琇

張伯桂

互見文學

張露

互見文學

甘美

李天駿

續修白鹽井志

卷七人物志

宦蹟

三十二

王紹熊

羅憲章

互見文學

張

昊明萬厯歲貢也博通經史才智出羣任江西俞

都教諭訓士有方薦陞上猶知縣廉明仁恕士民懷

之致仕歸與僕應東稱老友焉

採訪

樊仲琇雍正己酉經魁庚戌科進士也籤分貴州掌貴

山書院及門聯捷二人有入詞林者署龍泉縣逆苗

猖獗仲琇練鄉兵七百人造船渡江殺逆苗三千有

奇經略張廣泗壯其膽勇過人補授餘慶縣縣經殘

破之後民俱流亡仲琇悉心招撫歸業請賑不足捐

俸繼之又叠遭水旱火災殫心拯救積勞病故經畧

准貴陽府公呈 題人名宦祠 并舊志

張伯桂乾隆間舉人也任順甯麗江等府教授陞江西廣昌四川犍爲知縣清靜和平士民交頌解組後有益於公之事加意倡助曾謁山東孔林著有紀勝集 採訪

張 露乾隆丙辰 恩科舉人也以大挑授廣西荔浦知縣勤於民事期年頌聲交作適奉檄加糧露力陳民間疾苦上官斥之遂棄官歸縣民具送萬民衣傘至井主講靈源書院十餘年先德行而後文藝及門之士恂恂禮法當時科甲皆其高足云 採訪

續修白鹽井志

卷七人物志

宦蹟

三十三

甘 美乾隆乙未科進士也任四川蒲江縣署青神調銅梁爲政清慎廉明愛民禮士以徭役苦累力陳民隱忤上官意遂解任赴京卒於寓 採訪

李天駿乾隆乙丑科進士也性儒雅 博學選授四川溫江縣清靜和平去任時縣民立德政碑以誌遺愛其署什仿汶川等縣皆有善政可紀 採訪

王紹熊字相周道光乙酉科拔貢也幼穎悟英年食餼試輒冠其偶學使殷公作梅器之朝考籤分廣東厯署萬州陵水等邑皆有能名其任萬州也屬多盜捕至輒買人充抵而方言啁啾不可辨惟以書吏所通

之言決遣而已紹熊悉其弊遂捕真盜寘之法其在陵水捐廉開荒以給民之流離失所暢者至如嚴辨巨豪以斥行賄之人講學不倦以誨肄業之士則蒞遂溪乳源之時也解組後民歌德政且載於邑志焉

採訪

羅憲章字古亭道光乙未經魁甲辰進士也少聰穎性靜穆意氣灑脫雅好讀書博學工文藝下筆千言立就人爭揣摩之任福建泰甯知縣有政聲縣民爲立去思碑題授鳳山縣縣本海洋習俗重財輕學蒞任後禮士尙文勤於課試衡校恒至乙夜拔置寒畯人

續修白鹽井志

卷七人物志

宦蹟

三十四

知向學他如革漏規興水利修文廟建社倉次第修舉咸豐九年台灣生番勾結遊勇煽亂縣首被兵民皆驚匿憲章飛請援兵聯保甲飭守具備糧餉授兵登陴賊知有備不敢逼援兵至一戰而勝縣城得全民慶更生以功加道銜題陞噶瑪蘭同知積勞成疾未赴任而卒

採訪

義行 人物志之六

并舊志以文行一篇兼載孝義而滇志以忠節義行合爲忠義一篇體例未協茲折衷史志於忠節卓行孝友文學各立專目若夫樂善好施從容就義者則以此篇載之庶類聚羣分於輕重本末之間各有攸當而不致相混矣

明

王聰慧

王克良等六人

張曰宿

李鍾武

弟鍾彥

國朝

陳經

陳廷佐

詳文學

甘岳

詳卓行

續修白鹽井志

卷七人物志

義行

三五

王顯相

甘洲

子二 孫茂 瓚

張爲沛

羅士潔

楊天祥

羅銓

詳卓行

彭泰年

詳卓行

陳斗光

張仲樾

李修易

張聰 李修政

楊德模

王承宗等五人

劉晟

子清 白滙

王心濬

甘從源

子恆

羅萬理

詳孝友

張裕遠

布文星

羅萬選

張鳳翹

張金鰲

張膺培

羅堯章

互見 孝友

甘時宜

王士慶

五人

羅龍章

白盛唐

王恩榮

常學瀛

何德沛

羅傳章

何永興

周忠

曾東魯

張國寶

彭紹孔

張

沂王懷信
十二人

張壽愷

李光輔
等七人

甘

潮

王聰慧前明白井提領所實之子也於井南北極山峭壁鑿石爲龕數處修建文殊閣今爲名勝又創造環龍橋義舉甚多續捐送文殊閣田租者有王克良王嘉謨石懷卿石會卿何乃恭白盛唐等六人亦有義舉

採訪

張曰宿明姚安庠生也樂善好義捐建磨石江石橋以利往來所積財產均惠諸姪族黨稱爲尙義君子壽至八十歲

採訪

李鍾武鍾彥昆弟也崇禎末年孫可望踞滇舉人席上

續修白鹽井志

卷七人物志

義行

三十六

川三

珍起兵討之兵敗被殺可望遣僞官至井督課鍾武等設計給僞官至焚夷田縱酒豪飲令家客黃起龍等伏路側刺殺之今名其地爲黃起龍坡蓋地以人傳也事聞賊遣張虎領兵剿井感土主顯靈乃止不屠惟戮首事數人而去

採訪

陳經姚安府文庠也慷慨重義呈請遷建學宮倡首捐貲並送學地建明倫堂匾額提舉江承默嘉之事載碑記進士陶珽亦有記同時有庠生李文中遷學宮時捐送所居房基提舉額其門曰黌宮讓畔又公舉庠生王廷諫監修朝夕勤慎不憚其勞亦以地基

捐送提舉王文瓊重修時提調者有僕應東張慶百
李紹沅任事者有王廷試張嗣百楊茂春王政純諸
君俱有勞焉

井舊志

王顯相縣文庠康熙初年久爲社學館師積穀三百餘
石而無子夫婦力行善事族之貧乏悉周之更捐金
範

至聖像提舉鄭山重其義給匾嘉獎

井舊志

甘 洲康熙間歲貢性敦孝友積學授徒學院繆給以
南宮雋品之額與提舉楊光遠鐫送感應篇證註子
三長二西康熙間歲貢適修建賢宮竭力從公人多

續修白鹽井志

卷七人物志

義行

二十七

信服次二南雍正間歲貢助修明倫堂玉皇閣關聖
殿等處與兄二西弟增生二瑋贊助其事率族人置
義田孫茂由師宗州學正陞廣南府教授致仕後創
先師會以五馬橋鋪面四間送入賢宮

採訪參舊志

張爲沛康熙末國學也性純雅好善樂施倡首興

聖會修橋梁還遺金諸多義舉時人稱其賢復捐

文昌宮香火田租提舉高獎以善靄桂香之額

採訪

羅士潔雍正乙卯拔貢河南歸德府推官也秉性孝友
好義急公以父貢生羅銓於雍正元年捐送金旦庄
義田詳准立案仍令本主收掌散給乾隆九年士潔

呈請將義田歸官經理不准子孫干預俾父義舉可以永存復捐銀壹百貳拾金創建倉廩以備收存井司通詳給匾在案

採訪參舊志

楊天祥陰陽學雍正十三年孫於仁在南關外拾銀壹封歸告祖天祥見包裹緊密約八兩有餘知非富家物命子徧訪不獲復令鄉約同查乃鄉間兄弟二人無力塋親當身物也詢其數相符慨然還之二人泣謝鄉約乃率之同鳴於官提舉劉邦瑞深嘉其義予之冠服旌以祖孫尚義之額後於仁子楊德美中本省亞元人以爲厚德之報云

採訪參舊志

續修白鹽井志

卷七人物志

義行

三六

陳斗光文庠也重天倫敦孝弟薄華侈而忘名利雍正間重修文廟斗光捐祖遺柳樹塘田租十石爲學宮歲修之費提舉劉邦瑞詳准泐石旌以尚義興文有碑庠序之額後捐天台寺香火租六石事載碑記

井舊

志

張仲樾雍正間國學也性溫厚饒智識充當總理適鹽督道李衛臨井以薪缺湊淡欲填封井口井人爭之不能得仲樾謬持盞酌酒以進暗投鹽麪其中李味之甚鹹遂釋填封之意並准借柴本以種樹給薪工以贖煎獎以鄉井公勤之額

採訪

李修易乾隆間增生也慕義樂善將井東大龍潭山塲一嶺內有田租三石五斗其餘山地開墾議租計價銀三百二十金捐送學宮張聰亦捐送田租二石時有歲貢李修政者八品壽官也將祖遺大麥地租穀十二石捐入學宮均載碑記

井舊志

楊德模乾隆間拔貢也五十八年與同志歲貢王承宗廩生羅道元何琦增生張裕遠武生王心浩等具呈請准永免童生府考並出貢諸事亦不經府轉試與黑琅井一體免試在案

採訪

劉晟鄉飲介賓也家富饒好義樂施乾隆五十八年

續修白鹽井志

卷七人物志

義行

三九

以田租捐送學宮歷獎匾額則三院有情殷向義提舉王子音有首襄藝林通學有文正遺徽各額並一聯云好義興文百代芳名光學校捐資成美千秋盛事播儒林其孫青藜恩貢生舉大賓與弟乙藜互相友愛老而彌篤六世同居子姪八人亦皆率教先後入庠通學贈以白髮老兄弟青雲賢子孫之聯同時有白滙者例貢也輕財好義捐送龍吟書院田租貳拾石以資膏火巡撫劉旌以義播儒林之額

採訪

王心濬姚州文生天性孝友事親能盡色養昆弟五人析居時均分授手置之業毫無私積自奉儉約慕義

樂善充當喬井竈長十餘年以田租二十石捐作桂香義館修金並書送契有聽憑公家擇師授讀之約以停館四年存積於文昌宮側建舍三楹爲設帳之所上憲旌以復興鄉塾之額又倡同志捐金存公生息置田租二十餘石捐入黌宮於喬井公山開田以作香火其他善舉均成其美人無賢愚皆敬服之採訪

甘從源文庠生性渾淪樂善好施不計財力義舉甚多壽至九旬子恆亦文庠也善體父志雅好周急見義勇爲終身不懈其尤著者於山神廟甘露菴一滴菴

續修白鹽井志

卷七人物志義行

三十

等處捐送田租募役應水以濟行人之渴歲終送貧乏錢米新正施食飲數日至今猶繼其美焉採訪

張裕遠乾隆間增生性敏達臨事有識義所當爲直任不疑家素封因白井銷地爲安豐侵佔白鹽墮銷賠課竈戶家產悉以充公裕遠充當竈長與布文星率眾竈赴省投訴請永閉安豐認解課額上憲批准改爲竈煎竈賣之例復擬公局章程呈請立案自後銷數日暢積困頓紓又請免歷年欠繳課銀十餘萬兩內有積存餘銀欲闢墾公田一庄預防井竈賠累有如其能而欲染指者力持異議事遂寢然公論未

泯以有裨斯文之額與布文星各贈其一後人思之
設位於局樓以頌其德提舉藍桂各以公正可風之
額贈之蓋始終襄助惟文星有同志焉他如以自置
之產分授昆弟宗祠之建獨肩其任以及高堂之塋
養弟妹之婚字自任不辭其善行筆難罄述焉採訪
羅萬選嘉慶間增貢生性謙恭慷慨重義人有急難傾
囊無所吝諸善舉悉成其美至捐送涵水作孤貧口
糧尤爲百世之惠採訪及舊志

張鳳翔州學文生也性英敏有幹才見義勇爲謀而能
斷道光中充當總理適劍川州土人私開喬后井煎

續修白鹽井志

卷七人物志

義行

三十一

鹽四出售賣白鹽銷數大減竈戶變產繳課賠累不
堪鳳翔與庠生甘煊赴省請員填封喬后自此銷數
日增月定額鹽壹百餘萬家給人足頓紓竈艱捐貲
建羊蹄江橋免行人沉溺至竭力扶助族性婚喪義
舉甚眾以軍功加捐訓導署武定州補授羅次縣卒
於任同時有武生張金鰲者字元龍氣度寬宏才識
敏卓亦充當竈長秉正持躬以井地爲己任時鹽課
征不及額官竈交困遂設下關鹽號課裕商通與鳳
翹齊名誠一時之瑜亮也採訪

張膺培鄉飲介賓長厚和平好義樂施以節婦貧寒者

多久未舉報節孝咸豐四年捐貲設席公所約通學
採訪彙報與長媳得邀 旌表焉採訪

羅堯章字昭平增貢生進士憲章之弟性孝友負氣節
慷慨有大志幼年家貧失怙孀母有痿痺疾卽知侍
奉刻不稍離人多憫其孝長而明敏臨事謀而能斷
人有患難輒委曲排解有俠士之風焉咸豐六年回
夷交叛流寇以白井富饒欲資以起事暗糾數百人
由東南各關突放銃礮呼聲鼎沸蓋乘內亂以取之
也堯章見勢危迫著短衣持銃礮號召鄉勇當先率
之出東關迎敵礮甫發賊首蕭帥主見礮不燃揮戈

續修白鹽井志

卷七人物志義行

三十二

而進礮猝轟發賊首洞胸立斃堯章驅眾追殺他關
之賊亦皆潰散九年夏夷匪石馬將陷井礮訓導張
錕衣剗其腓民皆驚匿堯章奔至力護馬將怒顧其
下殺之夷眾夙欽堯章品望掖之退遂擁錕至五馬
橋裂屍懸柱上無敢收之者堯章約趙士鰲等醵銀
贖錕首聚屍厚殮之以禮厝於羅氏祖塋匿其妻子
於家事平遣人護送回籍其他施粥施棺寒衣等義
舉甚多善化愚頑感悟者眾人皆以義士目之適滇
西賊勢日熾自擬平賊要務數十條繞道赴省呈遞
憲批有經濟才畧一時無兩之語保舉訓導留省差

委堯章知其言不用告歸避地東鄉不肯蓄髮有舊識而爲僞官者屢以遊詞相誘力斥之後聞官兵屢敗回逆全師圍省終夜唏噓竟以憂憤卒

採訪

甘時宜國學生也性剛方治家嚴肅游惰子弟皆畏而敬之道光二十六年重建學宮時宜董其事朝夕經營規度舉增生王祚監工同任其勞迄今閱五十餘年屢遭兵燹而檐楹垣階歸然如新

採訪

王士慶道光間文生也秉性豪爽績學能文工吟詠出口成章遇事無所觀望咸豐九年練日蕭遇春奉檄帶練催課凶頑貪酷以索賄釀亂刑斃多人滿載而

續修白鹽井志

卷七人物志

義行

三十三

去士慶與文生洪輔清季允修布紹賢何天清五人步行赴省攔輿泣訴巡撫張訢其實梟遇春於省市以其首解井懸示焉

採訪

羅龍章附貢生國子監典簿也性豪華勇於爲義席先世之遺於周急恤患之舉始終不怠喬井滷味淡薄薪費鹽紬龍章倡首籌貲開井一眼滷味醴厚取名大中井至今猶享其利同治間死於井陷之難

採訪

白盛唐道光間文庠也老成厚重慕義樂善好施濟創

建宗祠道光二十八年重修學宮捐金六百擴修泮

池較舊時堅固工整人咸義之時有國學生王恩榮

有龍吟書院後地基一塊捐送書院以作公地

採訪

常學瀛文生道光末年五馬橋上下屢遭回祿堪輿家言街似丁字之故若改爲十字此災可免而學瀛同姪常貴常興之房正當其衝原價三百金學瀛慨然將已產捐送入公其姪各捐送五十遂折毀通河自後遂無火患有何德沛乾隆間人也將尾井賣柴街舖房一間捐作尾井行宮事載碑記

採訪

羅傳章道光間武生也性孝友英敏豁達幼孤失學及長勵志讀書博通史籍道光之季知滇南將亂有志用世遂致力韜畧遁甲象數之術殫心研究奉孀母

續修白鹽井志

卷七人物志

義行

三四

得其歡心遷厝父柩獨任其勞尤好施濟勇於爲義井陷閉門薙髮咸豐十一年三月有疾未愈值官軍潰散回匪陷井憤恚而卒

採訪

何永興等五人井民也喜任俠尙義氣道光二十七年永昌回民謀叛姚州回僇三竅等在井結黨聯盟應之持刀尋豐肆掠傷人民心惶懼永興等憤怒聚集同志持擔滷木材圍而擊之擒送署監禁民得安枕隨將三竅等解州伏法其黨捏詞誣控

上憲欲安

回眾之心將提舉李承基解任並飛檄逮井紳多名械省嚴辦眾皆恐惶計無所出永興等挺身就逮自

供不諱不波及一人讞上永興斬決由榮章絞決張洋在監病故白恩誥何其盛同流貴州其盛不知所終恩誥於咸豐元年赦歸

採訪

周忠東關人也妻唐氏開飯館爲業咸豐七年八月有夷民因訟事攜銀往姚至館午餐遂大醉遺所持之銀而去酒醒方知急回尋訪痛哭不已氏詢其數相符慨然還之夷民酬謝不受井人士義之贈以見利思義拾金不昧各額

採訪

曾東魯六品軍功充當姚州半里糧約咸豐九年四月夷匪石馬將踞井姚州知州普惠率姚團攻之馬將

續修白鹽井志

卷七人物志

義行

三十五

伏誅夷眾潰散惠營井南之一滴菴前鋒先驅入井肆行剽掠井紳憚姚勇之悍莫敢迎訴東魯慨然請行至通濟橋爲悍勇所殺

採訪

張國寶國學生同彭紹孔充當管事咸豐九年練日蕭遇春奉委帶兵催課大張聲威百計索賄二人堅拒不厭所欲其黨陷之觸遇春怒施以酷刑先後斃命

採訪

張沂井學廩生性豁達博學工文藝才氣敏捷學政葉觀儀目爲大器咸豐九年夷匪陷井姚州知州普惠率民練克復夷匪敗踞灰坡沂集文生久愈清義

勇王懷信李光輔樊克昌王城王松亭布兆熊洪敦
五常俊李春山張國棟王應祥等率井練攻擊擒斬
多名夷匪不能支退踞三岔河沂等移營進逼屢有
斬獲武弁蕭遇春所部悍練輒冒其賞沂練丁與之
相持悍練怒尋釁毆之傷重而死採訪

張壽愷廩生也同治八年白井初平大軍西征統兵者
委武弁坐鎮月定額鹽壹百餘萬薪銀僅發柒錢竈
戶變產賠累猶不足至有將涵担予人以免賠課者
十年春壽愷同附生李光輔廩生季允修增生陳學
孔貢生甘承祖白玉堂陳遵孔甘於詩等倡首會五
續修白鹽井志

卷七人物志

義行

三六

井公議遂星夜往黑井呈請署鹽道張補用道岑臨
井更定月額三十萬發薪銀壹兩鹽政仍歸井官辦
理革武弁把持井人始獲更生焉採訪

甘 潮字滙川同治庚午科舉人編修甘守先長子也
幼英敏長有幹才處世謙恭好義樂善咸同間充當
竈長時白井多故人民流離困厄潮因事維持遇患
難者暗爲排解周恤貧乏無所吝事孀母撫幼弟人
多稱其孝友云採訪

文學人物志之七

後漢書有儒林文苑兩傳以經籍屬儒林詞章屬文苑史家多因之并舊志文行合纂序畧云文以擴其知行以踐其實蓋本於聖教文行兼重之意也然準之史志體例駁雜茲倣漢志例於德行各編外別爲文學一篇凡博通經史學優才粹教授於鄉爲後學所楷模者採而錄之以彰

國家同文之治焉

明

契應東 詳鄉賢

續修白鹽井志

卷七人物志 文學

三七

國朝

石鳳翔

段九綉

陳廷佐 互見義行

李建中

詳卓行

王遜

詳卓行

彭泰年

詳卓行

趙其名

詳卓行

夏瓊

詳卓行

張暉堂

詳卓行

張楹

弟植詳卓行

張璧

詳卓行

洪酌文

李繼朝

子仙才

張鐸

陳醞和

甘維松

孫時治

陳炳舜

張敦樸

張露

詳宦蹟

羅士浩

張伯桂

詳宦蹟

陳世德

羅萬鍾

張曇

張作相

子景旭

羅慶宓

羅憲章

詳宦蹟

張暉臺

姪培陞

甘渠

羅天章

洪長清

何天秩

羅羣書

詳忠節

張宸誥

弟宸黼

久聯魁

王士廉

羅羣能

趙士騏

何永圖

王璽

王士美

子開先

羅經章

羅羣芳

李際實

李世盛

彭紹先

李月輝

甘浦

王培潤

劉淳

布方俊

石鳳翔歲貢生時白井文風未開師承鮮據鳳翔從府城名宿遊究心理學歸教鄉人門人庶吉士王翰以翰院儒宗之額表其門

井舊志

段九綉縣庠生性方嚴博通今古多士半出其門年八

續修白鹽井志

卷七人物志文學

三六

十餘猶樂與生徒講論不倦公舉鄉飲饌賓

井舊志

陳廷佐貢生博學工文長於詩賦創修井志多出其手設教文昌宮捐館金以廣廟地子弟窮乏者悉輔助之

井舊志

洪酌文康熙間貢生遺其名研精理學開館授徒多所成就昆明陳時夏遊學至井師事之時夏旋中康熙己卯舉人丙戌進士雍正間官江蘇巡撫贈以鹿洞真傳之額石書恭奉酌文洪老夫子左書受業門人陳時夏頓首其額猶存

採訪

李繼朝康熙癸未歲貢學問博洽工詞翰著有石羊賦

長子仙才癸未應貢呈請以貢讓父仙才至甲申方
出後任南甯縣訓導性曠達薄奢華怡情山水自號
石谷老人著有石谷草

採訪

張鐸康熙間歲貢也性純篤任建水教諭作育有方
勤於啟迪同寅以老而不倦目之通學徵詩歌以誌
景仰焉

採訪

陳醞和乾隆間歲貢也幼聰穎好讀書文藝優長兼工
書法屢薦未售赴國子監肄業以教諭選用回籍而
卒

採訪

甘維松乾隆間歲貢也篤行力學提舉李贈以圭璋特

續修白鹽井志

卷七人物志

文學

三九

達之額暮年嗜道學澹泊自如姪孫時治嘉慶癸酉
舉人言行謹飭湛深理數之學爲文渾樸精粹不事
章句好筆錄之術晚年猶不輟焉

採訪

陳炳舜乾隆間恩貢舉人陳瑛之父也善承先志雅好
讀書優於品學當時科甲多出其門通學推重贈以
學富醇儒之額迄今尙存

採訪

張敦樸乾隆乙卯科舉人也博學能文敦品自飭以大
挑歷任浙江鄞縣福建仙遊縣知縣有惠政士民懷
之致仕旋里著有格言詩集

採訪

羅士浩乾隆間恩貢也性孝友砥礪名節學問宏博善

屬文提舉高錦郭存莊慕其品學聘爲館師井中名士多出其門急公好義有古俠士風焉採訪

陳世德乾隆間文生典章之父也品端學博尤工古今體詩其所題詠皆有裨於風化焉採訪

羅萬鍾增生好學深思博通羣籍工文詞嗜飲每構思飲極醉執筆一揮而就興致淋漓人咸異之屢薦不售督學某選刊考卷曾鐫其文數篇云採訪

張曇嘉慶戊午科舉人也學問淹博有文名性謹飭任石屏州學正善教生徒卓有循聲採訪

張作相嘉慶間歲貢舉人露之子也績學能文授永平

續修白鹽井志

卷七人物志文學

四十

縣訓導以作育人材爲心口不言利善誨生徒有以詩文就正者不憚斧削時有咳唾珠玉之譽致仕歸士林贈一聯云維此惠君高山仰止彼都人士何日忘之饋贐悉卻不受子景旭咸豐間恩貢生少年穎悟博通羣籍性高邁善屬文人多稱之採訪

羅慶崧嘉慶戊寅科舉人敦品力學博極羣書工文藝弱冠登賢書講學授徒多士半出其門以大挑授元謀縣教諭日課諸生文法循循善誘元謀文風之振實始於此咸豐間陞麗江府教授時麗江爲逆回所踞未之任元謀亦被兵憂鬱而卒著述甚富經亂稿

無存者採訪

張輝臺道光間廩生性溫良工時文尤長於教讀士類多景從焉其姪培陞文生性謙和謹飭博學多聞工書法教授生徒循循善誘時人重之採訪

甘渠道光己亥科舉人幼聰穎性孝友恪守子職循循禮法課徒象山蘭若教法詳整從游者眾部選順甯教諭未之任卒士論惜之採訪

羅天章道光間文生孝友純和博學多聞購藏古搨甚富遂以書法馳名尤工草隸遠近索書者日踵至得其片紙寶若尺璧同時有文生洪長清者性溫雅力

續修白鹽井志

卷七人物志文學

四十一

學多材藝摹柳公權筆意酷似其體遂以書法稱於時採訪

何天秩同治初恩貢也性敏悟勵志力學善書法久從大姚劉太史遊爲入室高足時人頗引重之採訪

張宸誥全弟宸黼咸豐間同榜文生也性孝友父早故奉事孀母愉色承順曲盡友愛好學博覽襟懷灑落宸誥尤工吟咏精數學宸黼詩文甚多著有千家姓集人以典核融洽稱之因兵燹俱以憂憤卒集稿亦散失無存者採訪

久聯魁咸豐間恩貢生也持躬謹慎酷嗜金石之文收

藏甚富以書法見重於時得其片紙人咸寶之同時有增生王士廉講學授徒工書法索書者踵接於門焉採訪

羅羣能恩貢生舉人慶崧子也少英敏有妙悟精制舉業過目成誦下至醫卜星象悉皆涉獵肄業五華書院歷任山長咸善視之朱檄堂黃渠卿先生尤器重焉咸豐十年回匪陷井以卧疾未避殺於牀採訪

趙士騏咸豐間文庠學問博洽守分安貧以教讀爲業學規謹嚴從游者敬而畏之多有名於時採訪

何永圖同治間恩貢也長厚和平績學工文藝屢薦不

續修白鹽井志

卷七人物志

文學

四十二

售同考官有評云黃鐘大呂之音清廟明堂之器同時有王璽亦恩貢也博學謹樸與永圖齊名兵燹時閉門講學不改儒業維持文風二人有同志焉採訪

王士美文生也有孝行博學能文工駢體開館授徒從遊者眾子開先咸豐乙卯舉人也性純雅淹貫經史尤工尺牘任甯州學正卒於任採訪

羅經章增生性謹慎好讀書學優才瞻文名籍甚屢薦不售人多惜之博通藝術兵燹後充當竈長諳練舊事老成碩畫裨益甚多採訪

羅羣芳歲貢生同治庚午科舉人性警敏學問淹博精

時藝尤工吟咏臨事有膽識好謀能斷人多就之決策焉

採訪

李際實光緒初廩生也敦孝友能詩文立品方正教徒爲業及門成名者多同時有增生李世盛者亦博學能文並以善教著與際實齊名

採訪

彭紹先同治癸酉科舉人也性紓緩淹通史籍曠達和平工詩文援筆立就教授於鄉成就者眾後有李月輝光緒間歲貢和平樂易有文名教讀數十年人多從之

採訪

甘浦光緒乙亥科舉人性警悟創建朱子祠及修補

續修白鹽井志

卷七人物志

文學

四十三

川八上

東西廡書院等處獨任其事先後主講龍吟書院十年從游者亦多焉

採訪

王培潤失其名不知何時人志潔行端以敦篤自飭工詩文尤究心於古訓筆之於書久而成帙自撰勸孝及酒色財氣詩數十章本至性發爲至言足以維世勵俗章後評語乃大姚圭山毛孝廉所識發揮詳明人多感悟

採訪

劉淳字晉之咸豐初恩貢也性和平博通典籍才學優長肄業五華書院十餘年文名籍甚屢薦不售尤耽吟詠頗得詩人風致孝弟錄勸孝詩刊本俱有識

語後有布方俊者字子英同治間歲貢性峻厲好修飾饒文藝有名於時採訪

續修白鹽井志

卷七人物志

文學

四四

流寓人物志之八

風景不殊伯仁興山河之歎龍門未見謝朓賦白雲之賤遠適異國思歸者所以託黃鳥也白井爲西迤重地肩摩轂擊賓至如歸故名高士往往來遊或以謫宦寄跡或以游學僑居或以適情卜築流風軼事亦有可徵採而紀之庶羈旅之賢亦不致泯沒無聞焉耳

明

古心

陸元原

尹先覺

國朝

續修白鹽井志

卷七人物志

流寓

四十五

黃向堅

陳時夏

孫文達

吳國柱

戴炳星

李舒玉

趙淳

胡蔚

趙洋
吳祖馨

古心四川貢生崇禎間任雲龍知州遷姚安知府流

寓白井持身廉介文學馳名

井舊志

陸元原昆明舉人素有文名尤工詩崇禎間任大理府

德昌知縣寓家於舊井大街

井舊志

尹先覺籍貫失考相傳仕至金騰道因失守謫白井提舉志存高尚築室井東南之龍山舉家偕隱至今遺

蹟尙存

井舊志

黃向堅江南蘇州人父孔昭崇禎癸酉科舉人知大姚縣事順治二年乙酉鄉試聘爲同考官丙戌復攝三姚篆會沙定州作亂攻楚雄金滄道楊公畏知悉力拒守推孔昭爲元武監軍楊公兵敗被擒孔昭得脫轉徙至白井遂家焉向堅以八年辛卯冬自吳入滇尋親次年夏至白井復詣父之門生故舊謀貲斧奉其親歸吳往返將二載於道路則歷二萬五千餘里其時吳楚滇黔兵戈迭警人煙寂寥關隘阻滯行人斷絕其幸脫於險危卒能侍親以歸者非天之默鑒其孝不及此有向堅自述尋親紀程載於滇繫茲畧續修白鹽井志

卷七人物志

流寓

四六

述其概云

採訪

陳時夏昆明縣文廟街人少年落魄流寓至井好讀書受業貢生洪酌文之門虛心研求學大進先居象山寺題山高月小之額其時有孔道人者亦儒流時夏從之遊遂僑居天乙山西廊攻書山旁村中有于老人夷民也性樸野與時夏莫逆日以食物相饋歷久不衰時夏學成別去遂登康熙己卯賢書丙戌成進士雍正間官江蘇巡撫製鹿洞真傳之額派員資至白井懸其師之堂並迎于老人至蘇供給優渥老人厭繁華悉屏去仍安其常居久之辭歸贐以金帛堅

拒不受仍委官伴行並給以傳牌沿途照例迎送有
某令家丁見蓬髻顰面褐衣草屨者突入署以鞭撻
之使出時夏聞之怒遂以他事罷其官相傳隔省叅
官一事蓋指此也時夏留題甚多年久遺失惟二匾至
今猶存 採訪

孫文達陝西富平人父自慎幼聘樊氏未娶貿易白井
復娶李氏生文達遂家焉自慎父故樊氏守義過門
孝姑終養歷四十餘年富平公舉節孝奉 旨旌

獎移咨滇藩催自慎回籍而自慎已故文達娶妻李
氏有妹未字皆以安土重遷難之文達告母曰嫡母

續修白鹽井志

卷七人物志

流寓

四七

樊氏如此賢孝忍令其無子侍養乎母曰汝欲爲孝
子與汝同歸可也遂具呈奉母攜妻妹扶柩回籍以
養樊氏富平人高其孝復公舉孝義 恩賜六品冠
帶榮身並旌其生母李氏節孝 井舊志

吳國柱直隸定興縣人雍正末年從宦至井見妙華菴
傾圮有志興修遂盡出已貲不足則以募化繼之凡
殿閣神像悉皆新建丹雘輝煌煥然一新暇輒盤桓
三俊樹下歿後卽厝於菴側墓誌今猶存 採訪

戴炳星鎮南州庠生天姿聰穎性通脫工吟咏興之所
至時有新意入泮後僑寓白井不樂進取陶然自得

時與二三故交談論文藝娓娓不倦而於公門之條例尤爲嫻習晚年諳練老成問字者多從之遊焉採訪
李舒玉昆明歲貢也乾隆二十四年選授白井訓導性廉靜好學能文生童贄禮不與計較士林稱之卒於任其子家於井北隔谷村採訪

趙 瀄字龍溪趙州進士歷任東川鶴慶順甯等府教授好讀書窮探經史詩文膾炙人口乾隆初應聘分修滇志丁丑井司郭公存莊聘主講龍吟書院及門多所成就復以重修井志屬之遂與小阮孝廉聯映暨胡君羨門考疑信正體裁舉要刪繁分門別類而續修白鹽井志

卷七人物志

流寓

四八

井志以成其吟咏數章載藝文志採訪

胡 蔚字羨門湖南武陵人負才卓犖能古文工筆翰吟咏尤佳慕遊滇南所至爭禮之友有才學而落拓者推薦尤力彭竹林沙雪湖皆入室高足竹林登臚仕羨門所推轂也遺詩四卷亦竹林付梓以行修白井東川二志才識超越體例精詳新都楊升菴先生創南詔野史紀載疎闕羨門訂其僞佚正其踏駁爲滇雲典故善本云採訪

趙 洋道光間姚州歲貢性通脫警敏績學能文嗜酒工詞翰移居白井肄業靈源書院將爲詩銜孟構思

乃濡毫數章立就同人重之晚年設帳齊雲閣從學者眾

採訪

吳祖馨字香亭四川雷波廳歲貢性好遊多材藝光緒十五年提舉呂調陽聘至井授其子讀慕白井山水明秀有終焉之志以他故辭幕而出在署甫一年也賃廬後日以筆墨自娛工書法詩畫求者日不暇給而應之不倦旁通風鑑醫學尤精所診者應手而瘳性謙和端謹言行不苟望而知爲績學士井人士多重之樂與之遊焉

採訪

績修白鹽井志

卷七人物志

流寓

四十九

一

列女人物志之九

蘭芳菊秀清風表節婦之墳山高水長烈行紀貞姬之石蓋坤道成女固與乾道成男同秉五常之性者也然有時舍生取義矢志靡他較鬚眉爲更摯并舊志有列女一篇茲詳加採訪倣蔚宗范氏傳例仍著於篇於以彰志節勵風俗與棹楔之光共垂不朽云

明

張震妻

子世崇妻

樊明誠妻

李世增妻

席上珍妻

國朝

續修白鹽井志

卷七人物志

列女

五十

陳伊周妻

樊憲孔妻

白增妻

王九章妻

王希孔妻

張孔道妻

段九華妻

張仕縉妻

甘棠妻

張爾勛妻

李仙道妻

唐德焯妻

彭鶴妻

李仙德妻

張玉衡妻

甘維桐妻

王之心妻

王國英妻

陳一德妻

張岳祖妻

羅萬善妻

羅鳳儀妻

王思恭妻

布魁先妻

段塔妻

布峻典妻

甘恩溥妻

李友桂妻

張樸妻

張若麒妻

張輝亮妻

張輝亮妻

張理妻并妾

孟承魯妻

王運萃妻

張潤妻

張景德妻

張宸黼妻

唐某妻

李連清妻

張壽百妻

由榮章妻

何三壽妻

王守中妻

何汝珍妻

羅其銳女

王映清女

羅其俊妻

節烈婦女

四十名節孝婦女四十名李建勳妻

趙赴瀛妻

王錫誥妻

張震妻者王有成之女也年二十夫卒撫子世崇成

立娶婦李氏未幾世崇亦卒姑婦相依甘貧苦守嘉

續修白鹽井志

卷七人物志列女

五十二

靖五年提舉徐璣表其門曰雙節參雲南通志并舊志

庠生樊明誠妻及庠生李世增妻二氏皆貢生段紅女

弟也萬曆甲午并大疫兩生相繼而亡二氏年方二

十餘同矢志守節姊有子作屏妹有女李氏相為婚

姻作屏甫娶入泮而又逝婦李氏矢貞與二母同守

茹素禮佛終其身焉天啟五年提舉吳思溫旌以雙

節之額并舊志

舉人席上珍妻者封氏之女也明末流寇孫可望遣張

虎攻姚上珍起兵拒戰兵敗不屈死虎復襲并氏亦

被執入土主廟內有井欲投不得給守者以欲洩便

曰汝但閉門我安逃乎賊信之閉門而出氏遂投井死名其井曰節井咸豐六年建六角礎石亭於井上悉鐫井人士之詩詞經兵燹數十次此亭歸然猶存

參雲南通志井舊志

陳伊周妻者李茂之女也年二十夫卒遺腹三月生子名宣苦節堅守終舅姑喪塋時遭兵燹幾不克存卒全清操子亦成名康熙三年提舉趙大生詳請旌獎氏以家貧命子力辭以養壽終康熙五十年提舉鄭山以節孝流芳表其門六十一年督學張謙旌以貞德克昌之額

井舊志

續修白鹽井志

卷七人物志

列女

五十二

庠生樊憲孔妻者貢生王甯兆女也年十九夫卒遺腹生子魯哲苦志守節教子成名康熙五十五年卒守節三十三年督學蔣河以巾幗浩氣提舉白兌以韻和柏舟之額表其門

井舊志

庠生白增妻者王氏之女也年二十有五夫卒撫子萬正成立守節五十年卒雍正九年督學吳應枚旌以節孝可風之額

井舊志

庠生王九章妻者張氏之女也年二十有三夫卒有子肇統方六齡氏矢志撫子成立娶婦何氏生孫廕遠未幾肇統又沒何氏飲泣守節養姑育子康熙五十

年張氏卒計守節五十九年壽八十有二督學蔡嵩
旌之曰冰霜共潔

并舊志

王希孔妻者貢生張爾勛女弟也年十八夫卒無子矢志守節孝事舅姑撫姪家瑞爲嗣生三子家瑞旋卒氏撫孫成立守節六十餘年雍正三年提舉孔尙琨給以節並松筠之匾十三年奉

旨旌表

并舊志

張孔道妻者廩生陳名宣之女也夫卒撫孤成立壽至八十計守節四十五年督學孫人龍獎以年高節勁之額

并舊志

段九華妻者何氏之女也年二十有九夫卒有子紳甫

續修白鹽井志

卷七人物志

列女

五十三

僅八歲氏矢志養姑撫子子亦旋卒惟與孀姑相倚爲命壽至七十有五守節四十六年督學孫人龍旌以閭範堪型之額提舉劉邦瑞亦旌以額乾隆間奉

旨旌表

并舊志

庠生張仕縉妻者趙氏之女也年二十有八夫卒子夢麟方十歲氏矢志奉事孀姑教子成名孫紹濂景濂先後入泮守節四十餘年督學沈慰祖以藁行冰心之額旌之

并舊志

庠生甘棠妻者欽賜翰林夏勳姑母也夫卒氏年二十歲矢志守節事姑不怠教子甘維楹成名督

學沈慰祖以竹節松心提舉高錦以壺儀足式之額旌其門

井舊志

貢生張爾勛妻者周氏之女也年三十夫卒有子二人氏撫之成立孫映垣亦入泮年八十有三卒守節五十三載督學王宓以霜松雪柏提舉高錦以冰心筠節表其門

井舊志

李仙道妻者庠生王瑞圖之女也年二十有五夫卒遺子女各一奉事翁姑撫育子女守節三十二年督學王宓以惟節能貞提舉高錦以勁節慈心之額旌之

井舊志

續修白鹽井志

卷七人物志

列女

五十四

唐德焯妻者羅氏之女也夫卒年十八有子敏功甫六月氏矢志守節孝養翁姑教子成立守節三十餘載督學何其睿給以節孝可風之額

井舊志

彭鶴妻者夏氏之女也年二十有八夫卒無子撫嗣子成立督學葛峻起以節孝性成提舉郭存莊以節比松筠之額旌其門

井舊志

李仙德妻者庠生葉文耀之女也年十八夫卒子亦夭亡氏立志堅守以伯兄先學子廸謙爲嗣篝燈課讀子亦入泮守節五十餘年提舉郭存莊嘉其志以旌之

井舊志

庠生張玉衡妻者樊氏之女也年二十有一夫卒無子
矢志守節勤女紅以養姑撫族姪祥麟爲嗣守節四
十餘年提舉郭存莊旌之 井舊志

庠生甘維桐妻者文庠何惕之女也年三十歲夫歿守
節撫三子俱佑侔成名以耄壽終通學輓以聯云二
十一年苦節百千萬載馨香生時屢擬舉報節孝氏
力辭囑以後嗣登科方行詳請同治甲戌學政李端
棻獎以古井澄波之額光緒二十四年裔孫韶以選
貢赴京具呈禮部奉文咨滇行查在案 採訪

文童王之心妻者恩貢樊魯哲女弟也年二十有七生

續修白鹽井志

卷七人物志

列女

五十五

川上上

三子夫歿立志守節孝翁姑撫子國英殿英元英成
名守節三十五年督學給以孝純節勁之額乾隆壬

申奉

旨旌表

採訪

庠生王國英妻者舉人張志超志韶志亮嫡堂姊舉人
敦樸之堂姑母也年二十有七夫歿矢志守節撫三
子成立守節三十八年乾隆丙申奉

旨旌表同

姑樊氏合建一坊

採訪

庠生陳一德妻者白雲鶴之女也年二十有一生一女
夫歿守節二十四年壽四十有五嘉慶元年奉

旨旌表 採訪

張崑祖妻者庠生王國英之女舉人時行之姑母也年二十有五崑祖歿遺子培荇方三歲教以成立守節三十餘年督學獎以貞操裕後之額嘉慶乙丑年奉

旨旌表

採訪

舉人羅萬善妻者何氏之女也年十九夫卒矢志守節撫姪鳳儀爲子入泮娶婦子又卒撫嗣孫成名嘉慶間奉旨旌表壽至六十七歲守節四十八年採訪文生羅鳳儀妻者李氏之女也夫卒無子氏年二十二歲矢志守節事孀姑盡孝形影相依撫堂姪爲嗣教之成名孫羣芳領庚午鄉薦道光二十七年奉

續修白鹽井志

卷七人物志

列女

五十六

川三

旨旌表壽至八十三歲守節六十一年同姑何氏合建雙

節坊

採訪

王思恭妻者貢生趙秉聰之女也年二十有七生一女夫歿撫姪敦行爲子教之成名壽至八十八歲守節六十一年道光元年奉旨旌表

採訪

儒童布魁先妻者陸氏之女也年二十有五夫卒家貧矢志守節孝事翁姑子舜典僅三歲撫之成立壽至六十二歲守節三十七年督學楊獎以松貞蔭遠之

額道光元年奉

旨旌表

採訪

儒童段瑤妻者李氏之女也年二十有九夫卒子幼氏

矢志守節撫子成立壽至六十七歲守節三十八年
道光三年奉 旨旌表 採訪

布峻典妻歐陽氏嘉慶間人也夫卒守節二十九年道
光四年奉 旨旌表 採訪

儒童甘恩溥妻者楊氏之女也年十五歲恩溥待父之
太谷縣任病歿氏立志守節撫姪替爲嗣壽至五十
五歲守節四十年道光六年奉 旨旌表 採訪

庠生李友桂妻者王氏之女也有子光燦光旭友桂卒
氏矢志守節撫二子成立壽至九十六歲計守節六
十三年道光八年奉 旨旌表 採訪

續修白鹽井志

卷七人物志 列女

五十七

張 樸妻者異宗張氏之女也夫卒遺腹四月生子文
照氏奉事翁姑撫子成立守節三十餘年道光間奉

旨旌表 採訪

儒童張若麒妻者舉人王時行堂姊也年二十有五夫
卒有子女各一矢志守節子殤以姪澍爲嗣撫之成
立翁疾篤割股以進疾旋瘳壽至七十二歲守節四
十七年道光十五年奉 旨旌表 採訪

增生張輝亮妻者異宗張氏之女也年二十有二夫卒
無子矢志守節撫姪增生中和爲嗣督學李嘉瑞獎
以百世流芳之額壽至七十三歲守節五十一年道

光間奉

旨旌表 採訪

儒童張輝之妻者異宗張氏之女也夫卒無子氏年二十有三矢志守節撫姪庠生清和爲嗣督學顧莈獎以不負所天之額壽至七十五歲守節五十二年道光間奉

旨旌表

採訪

儒童張輝宸妻者夏氏之女也年二十有一夫卒矢志守節撫子培育成立壽至六十六歲守節四十五年道光間奉

旨旌表

採訪

增生張理妻者舉人王時行女兒側室乃楚雄文庠趙興邦姑母也理卒時王氏年二十有七趙氏甫十

續修白鹽井志

卷七人物志 列女

五十六

川上二

七歲姊娣立志守節形影相依事翁姑撫幼子備嘗辛苦卒全貞操王氏壽至七十八歲趙氏六十八歲各守節五十一年道光十五年奉

旨旌表其子

壽百建雙節坊宏敞壯麗屢經兵燹巍然猶存

採訪

孟承魯妻者恩貢何永圖女兒也年二十有四夫卒無子矢志守節以姪孫繼嗣事親教孫壽至七十歲守節四十六年咸豐三年奉

旨旌表

採訪

王運萃妻者李氏之女也年二十有九運萃卒氏矢志守節撫子成立咸豐三年奉

旨旌表壽至八十餘歲守節五十餘年

採訪

文生張 潤妻者恩貢張聯璧女兒也年二十有五夫
歿矢志守節撫子學易成立壽至五十有一守節二
十六年咸豐七年奉 旨旌表 採訪

張景德妻者進士羅憲章女弟舉人其澤之姑母也年
二十有三夫卒家貧有二子年俱幼氏矢志守節持
家教子艱苦備嘗家漸豐子亦成名中年持齋禮佛
好善樂施至老不怠壽至五十六歲守節三十三年
光緒十六年奉 旨旌表督學戴鴻慈獎以清節
流徽之額 採訪

文生張宸黼妻者文生李彩廷次女舉人如翼之母也

續修白鹽井志

卷七人物志

列女

五十九

川上上

年二十有七夫歿子如翼甫五歲氏矢志守節值回
夷叛亂家貧子幼奔避無甯日備嘗艱苦卒全節操
撫子入泮食餼旋登己丑賢書守節十五年光緒戊
戌奉 旨旌表提舉文源贈以聯云志共冰霜立

名不朽恩濃綸綽俾熾而昌又題額曰冰霜比潔

採訪

唐某妻者周氏之女也素循婦道孝敬不懈夫卒矢志
守節家甚貧翁姑年邁氏以鍼黹爲生晝夜勤劬以
奉甘旨凡事稟命而行順從無違生養死葬皆盡其
禮人以孝婦稱之無異辭 採訪

李連清妻者孟氏之女也家喬井翁姑早逝生子不育

光緒八年六月連清病故氏卽日仰藥以殉

採訪

監生張壽百妾者貴州同知銜池先春之女也年二十有八夫卒矢志守節奉二孀姑撫子應俔及二孫成名壽至七十三歲守節四十五年光緒十七年奉

旨旌表

採訪

由榮章妻者彭氏之女也道光二十七年逆回煽亂榮章集義勇擒戮多名被回反噬逮榮章至省絞決氏年二十餘歲矢志守節光緒十八年奉旨旌表壽至七十餘歲

採訪

童生何三壽妻者舉人張渠成之女也許字未嬪三壽續修白鹽井志

卷七人物志

列女

六十

病故女過門守節孝養翁姑咸豐十一年回匪陷井被執不屈服毒死

採訪

童生王守中妻者布氏之女也許字未嬪守中從軍戰歿女年十六過門守節咸豐十一年賊匪陷井被擄不從投井而死

採訪

庠生何汝珍妻者進士羅憲章之堂姪女也年二十有六汝珍卒矢志守節撫姪何孜爲嗣光緒二十一年奉旨旌表

採訪

武生羅其銳之女起第孝廉方正萬寶之曾孫女也年十六歲未字咸豐十一年回匪陷井女被執其父救

之賊怒將及其父女曰勿殺吾父吾與若去何如賊釋其父驅女行至大街女知其父已遁乃厲聲哭罵據地不肯行賊拳足交加體無完膚仍堅卧不起賊無奈以繩縛而曳之且曳且罵聲愈烈賊怒甚揮刃斫之身被數十創至五馬橋擲屍香水河中採訪

王映清之女恩第年二十未字咸豐十一年賊匪踞井有賊曰欲強娶之女不從自縊而死採訪

文童羅其俊之妻者王氏之女也夫歿王氏時年二十

三歲矢志守節撫孤子羣儒備嘗辛苦卒年六十五

歲共計守節四十二年光緒間奉

旨旌表採訪

續修白鹽井志

卷七人物志

列女

卒二

以上四名於光緒三年旌獎入祠

白井自咸豐九年至同治八年失陷十餘次其間節烈婦女殉難各異今卽其殞命之故彙而紀之至被難月日已於光緒三年旌獎入祠時詳報在案矣茲未遍錄非故畧也採訪案冊共四十四名

有堅拒不屈而被戕者何乃文之女王英年十六歲張經之女蓮姑年二十歲段愷之妻高氏年二十有一張國珍之妻李氏年二十有三何天佑之妻王氏年三十有六以上五名

有被擄不從而乘間自縊者張灝之女順姑年十七歲

何不緒之妻張氏年二十有三楊景春之妻李氏李
瀛之妻張氏段學成之妻李氏沈懋功之妻周氏以
上六名 後四名年歲無考

有奮投鹽井而淹斃者洪訓之女貴榮年十五歲段學
成之女保榮年十六歲張國紀之女秀姑年十八歲
王朝清之女妹姑年十九歲何孜之妻布氏杏姑年
二十歲甘鵬之妻王氏乃增生王詠之女年二十有
二同其妹王姑年十五歲王崇培之妻張氏年二十
有一羅家樹之妻張氏年二十有一布高南之女老
姑年十八歲季英之妻布氏年二十有一段名成之

續修白鹽井志

卷七人物志 列女

六十二

妻班氏年二十有五張奎鰲之妻樊氏以上十三名

後一名年
歲無考

有奔赴鹽槽而溺死者張克成之女昭姑年十八歲李
煌之妻謝氏年十八歲布綸膺之妻張氏年十八歲
文達中之妻李氏年二十歲彭紹孔之女壽姑年二
十歲李新之妻甘氏年二十歲張培根之妻李氏年
二十有一陳遵孔之妻楊氏年二十有二張文浩之
妻李氏年二十有六季書春之妻張氏年二十有七
王恭之妻張氏年二十有五布紀政之妹王布氏前
騰越訓導王式曾之女重恩以上十三名 後二名年
歲無考

有乘隙服毒而自盡者甘縉之妻王氏年十七歲彭蔚

森之妻王氏年十七歲羅丕章之女與第年十七歲王澤培之妻楊氏年十八歲王者壽之妻汪氏年十

九歲廩生白世賢之妾張氏年二十有三高志賢之

妻段氏以上七名 後一名年歲無考

節孝祠奉祀之位兵燹時有被賊燬者餘為增生王庭葆迎藏於家茲除舊志所載外而事蹟可考者各立小傳其無考者即其姓氏錄之庶不失傳信之意云

共計四十名

廩生李根元妻張氏 增生唐德耀妻王氏

儒童張 紳妻羅氏 儒生常 珙妻李氏

續修白鹽井志 卷七人物志列女 卒三

庠生趙汝櫬妻洪氏 庠生季勛魯妻王氏

儒童王國俊妻季氏 儒童布化南妻何氏

儒童張乃益妻王氏 增生張 誥妻何氏

庠生劉秀鼎妻白氏 增生趙秉惠妻李氏

儒童張若駿妻樊氏 儒童劉 諧妻張氏

庠生何瑞麒妻張氏 庠生王維相妻郭氏

庠生布 表妻王氏 儒童季 華妻王氏

儒童劉世輔妻陳氏 庠生孟兆麟妻楊氏

文生吳應昌妻王氏 儒童王 椿妻劉氏

庠生甘愈嘉妻李氏 儒童陳灼舜妻李氏

儒童陳統舜妻唐氏

庠生樊履和妻李氏

庠生張象奎妻王氏

庠生樊繹孔妻王氏

廩生楊世基妻王氏

監生張若麟妻季氏

儒童李時和妻樊氏

儒童王湛妻李氏

儒童布國良妻張氏

儒童唐有智妻張氏

廩生陳名宣妻李氏

儒童季保富妻李氏

儒童王斯源妻謝氏

庠生季肇烈妻王氏

貢生張志皋妻季氏

庠生沈國華妻洪氏

文童李建勳妻者文生王綬之姑母也年十七于歸李

姓越二年建勳身故時氏年十九歲上無翁姑下無

續修白鹽井志

卷七人物志

列女

李四

子女而氏回依父母家時值世亂奔逃四野竟爲賊

匪搜獲父母與之哀求賊終不允而氏以腰帶自縊

賊眾委之而去現年六十七歲計守節四十八年光

緒二十九年奉

旨旌表督學院丁獎以冰清玉

潔之額

採訪

趙赴瀛妻者文庠張輝泗之女也十六歲于歸次年赴

瀛卒無子氏矢志守節孝事翁姑撫姪趙槃成立光

緒二十四年奉

旨旌表現年七十一歲守節五

十六年

採訪

武童王錫誥妻者文生張福昌女舉人如翼堂姊也許

字未嬪錫誥赴省從軍陣亡氏年甫十五歲過門守
節奉姑及叔舅姑始終不息以從姪之臣爲嗣光緒
十五年奉 旨旌表現年六十五歲守節四十年
採訪

以上三名其人現存以奉旨旌表故紀之

續修白鹽井志

卷七人物志

列女

五

文十

仙釋人物志之十

釋老立傳肇自元史蓋本後漢書方術神仙同列而異其體例也南詔遺俗崇信釋道故名山勝境不少梵宇琳宮白井僧道之苦行清修者亦自有人謹依舊志而備紀之以見二氏之徒皆有可傳述者也

國朝

宗儀 廣福 吳道人 真寂

宗儀法號擊竹康熙初爲龍吟寺住持隨開迴龍山建元勝寺不憚其勞生平苦行惜福滌慮清修人爭禮焉 并舊志

續修白鹽井志

卷七人物志 仙釋

李六

廣福法號具足井人也幼年出家潛心禮佛苦志清修康熙乙未年捐貲百金虔鑄文廟金像 并舊志

吳道人原名李德全一名孔仙江西金谿縣籍隱居井西之天乙山裏足不入塵市者三十餘年童顏鶴髮預知羽化之日先期肅衣冠告別友朋次日果應時而去 并舊志

真寂法號平等賓川州人沙彌出家自幼戒行清嚴不慕勢利遊至白井創建齊雲閣壩仙釋諸像苦志守之至老彌篤年六十有餘圓寂之時作偈而去 并舊志

